

十七史商榷

十七史商榷卷六十七

東吳王鳴盛述

北史合魏齊周隋書三

魏地形據武定

魏收魏書地形志敘首云魏定燕趙遂荒九服夷翦
逋僞一國一家遺之度外吳蜀而已正光已前時惟
全盛戶口之數比夫晉之太康倍而已矣孝昌之際
亂離尤甚恒代而北盡爲丘墟峭潼已西煙火斷絕
齊方全趙歿如亂麻生民耗滅且將大半永安末年
逆賊入洛官司文簿散棄者多徃時編戶全無追訪

今錄武定之世以爲志焉正光前戶口倍於晉太康者太康猶承漢季三國大亂而正光時魏之平定已百餘年故戶口極蕃此言理宜有之恒代云云謂六鎮之叛杜洛周葛榮等反逆賊入洛謂爾朱榮及兆也武定是東魏末帝孝靜帝最後紀元其八年遂禪齊予前後論史例志地理有以最盛者有以最後者此真最後矣若論盛時則當以孝文帝太和中彼時遷都洛陽爲魏之極盛今不取而用武定爲正故志首司州而治鄴城本相州卽孝靜帝卽位之元年改元天平遷都於此而改名之其時已政歸高歡帝徒

擁虛名誠末造矣魏收之爲此要亦因盛時文簿已
亾不得已也此下又言其淪陷諸州戶據永熙綰籍
永熙是孝武帝紀年帝於三年卽西奔長安矣此志
中所列有郡縣名無戶口數者大抵皆他國地而虛
言之

官氏志

官氏志詳於官略於氏纂官京師同年進士廣西岑
谿令海寧周春范兮寄松靄初刻中有代北姓譜於
考索最有益久而佚去附識待訪

梁州郡縣數

梁陳無志隋書各志皆補梁陳事獨地理志專志隋
不補梁陳雖小字夾注中間一及之亦不備也惟於
敘首約舉梁地理云武帝除暴寧亂奄有舊吳梁天
監十年有州二十三郡三百五十縣千二十二其後
務恢境宇頻事經略大同年中州一百七郡縣亦稱
於此愚謂南朝梁爲極盛以饗國久且當魏亂故元
嘉永明太建皆不如雖其州郡縣數之多由析置者
無然土宇亦實恢拓假令陳慶之殺元顥據洛勢將
混一天厭梁德顥背恩慶之潰歸梁事去矣

陳州郡縣數

又約舉陳地理云侯景構禍墳籍散逸郡縣戶口不能詳究逮于陳氏土宇彌蹙西亾蜀漢北喪淮肥威力所加不出荆揚之域州有四十二郡惟一百九縣四百三十八戶六十萬愚謂南朝梁最盛末年却最衰陳之蹙承梁故也通鑑一百六十四卷梁元帝紀承聖元年十一月卽位於江陵改元大赦侯景之亂州郡太半入魏自巴陵以下至建康以長江爲限荆州界北盡武寧西拒硤口嶺南復爲蕭勃所據詔令所行千里而近胡三省注北盡武寧與岳陽王譽分界西拒硤口與武陵王紀分界通鑑誤以紀東下在

承聖元年故胡注如此其實此時蜀已爲周所取并
非紀有說見後六十三卷陳承梁雖平蕭勃而西不
能取蜀北雖暫有淮吳明徹兵敗被虜故曰北喪淮
肥土宇彌蹙

陳州數已見
前六十六卷

齊周分界

齊周亦皆無志隋書各志兼補齊周事獨地理則專
於隋不能旁及故於齊周亦皆從略惟於敘首約舉
齊周地理云齊天保末泊國滅州九十有七郡一百
六十縣三百六十五周削平東夏多有省廢大象二
年計州二百一十一郡五百八縣一千一百二十四

愚謂上文歷舉累代疆域大凡西漢極盛不過郡國一百三今周雖并齊尙未得陳且旣云多有省廢而州數比西漢極盛乃倍之有餘者蓋承歷代分析故說詳後予未暇徧考齊周地理惟是高氏宇文氏各欲盜魏構怨最深其分界必須有考方可見二國形勢二國戰地王應麟通鑑地理通釋第十四卷已詳其分界處則莫妙於周書太祖文帝紀云魏大統十六年夏五月齊文宣廢其主元善見而自立秋七月太祖率諸軍東伐拜章武公導爲大將軍總督留守諸軍事屯涇北以鎮關中九月丁巳軍出長安時連

雨自秋及冬諸軍馬驢多死遂於宏農北造橋濟河
自蒲坂於是河南自洛陽河北自平陽以東遂入於
齊矣此段最明了北史削去文宣自立突書東伐云
云竟不言所伐何國雖不言自可知然有此文理乎
廢立是何等大事齊周各自爲紀豈可不互見茲姑
不論惟齊周疆域分界處觀此一段約略可見洛陽
以東旣入齊而梁倚齊援周竟能越齊界伐梁以蕭
詡爲之導也說詳第五十五卷詡本鎮南雍州今襄
陽府周旣滅梁元帝立詡爲梁王居江陵而詡舊所
鎮之襄陽地歸於周見周書詡傳

周陳分界

周書杜杲傳於陳文帝時奉使往陳分界陳人以魯山歸周魯山卽今湖北漢陽府漢陽縣漢口鎮江岸山俗以爲大別者江北地已盡入周矣區區魯山豈能獨守然必至是而周界始直至江岸

隋州最縣

西漢極盛不過郡國一百三周平齊州至二百十一已爲極縣隋高祖開皇九載廓定江表尋以戶口滋多析置州縣是於二百十一中又分析爲最縣矣故楊尙希傳隋文帝時見天下州郡過多上表以爲今

郡縣倍多於古或地無百里數縣並置或戶不滿千
二郡分領具寮以衆資費日多吏卒又倍租調歲減
動須數萬如何可充

罷州置郡

隋書百官志云煬帝罷州置郡郡置太守又地理志
云煬帝并省諸州尋改州爲郡置司隸刺史分部巡
察大凡郡一百九十按唐虞時九州十二州歷三代
秦漢魏晉南北朝其名尙存至隋始革去州名事勢
古今不同不可泥古宋書州郡志有揚州南徐州南
兖州兖州南豫州豫州江州青州冀州司州荊州郢

州湘州雍州梁州秦州益州寧州廣州交州越州南
齊書州郡志略同惟多一巴州此名爲從前未有魏
地形志新添之州名甚多漢晉每州所管郡甚廣地
形志則每州所管郡有少至二三郡者并有不領郡
之州焉其州名新製者共有五六十梁陳齊周地理
無考而州郡總數見隋地志蓋承魏其分析亦多至
隋萬不能更爲沿襲蓋卽名稱紛溷已極不便不但
十羊九牧如楊尙希所云也

淮南郡

隋淮南郡注云舊曰豫州後魏曰揚州梁曰南豫州

東魏曰揚州陳又曰豫州後周曰揚州此卽壽春郡也州名南北互易最爲糾紛乍觀之幾欲目炫矣說已詳前第五十七卷豫治無定一條玩彼文此文自明

蠻左

隋地志末段云南郡夷陵諸郡多雜蠻左夙喪之紀無袒踊亦知號泣其左人則又不同長沙莫徭喪葬頗同諸左案北史齊高祖神武皇帝紀天平元年神武上表於魏孝武帝曰荊州結接蠻左密邇畿服蠻左卽蠻夷乃當時語崔延伯傳云除征虜將軍荊州

刺史荊州土險蠻左爲寇每有聚結延伯輒自討之
是也魏齊周諸書亦皆有之

通古今

兒子諸生嗣穫曰隋書經籍志敘首云經籍也者其
爲用大矣不疾而速不衡當作行而至今之所以知古
後之所以知今其斯之謂也按許氏說文自序云文
字者經藝之本王政之始前人所以垂後後人所以
識古故曰本立而道生隋書本此北史江式傳延昌
三年式表曰文字者六籍之宗王教之始前人所以
垂今今人所以識古又高允傳允荅景穆帝曰史籍

帝王之實錄將來之炯戒今之所以觀往後之所以知今語亦同韓昌黎詩人不通古今馬牛而襟裾欲通古今頗有字亦頗有史故字不可不識史不可不讀

續漢書百官志博士掌通古今學以通古

讀今爲要故特設一官妙選其人以掌之

經史子集四部

隋經籍志分經史子集四部案四部之名起晉祕書監荀勗中經簿一甲部紀六藝及小學等書二乙部有古諸子家近世子家兵書兵家術數三景部有史記舊事皇覽簿雜事四丁部有詩賦圖讖汲冢書尋前後著錄家皆分爲七如劉歆七略一集略二六藝

略三諸子略四詩賦略五兵書略六術數略七方技
略王儉七志一經典志紀六藝小學史記雜傳二諸
子志紀今古諸子三文翰志紀詩賦四軍書志紀兵
書五陰陽志紀陰陽圖緯六術藝志紀六技七圖譜
志紀地域及圖書道佛附見阮孝緒七錄一經典錄
紀六藝二日記傳錄紀史傳三子兵錄紀子書兵書
四文集錄紀詩賦五技術錄紀數術六佛錄七道錄
此皆雜亂繚碎惟荀勗稍近理然子不當先史詩賦
等下忽有汲冢亦不可解且甲乙丙丁亦不如直名
經史子集故隋志依用而又改移之考宋書殷淳傳

愛好文義未嘗違捨在祕書閣撰四部書目凡四十卷行於世梁書沈約傳齊初爲征虜記室帶襄陽令所奉之主齊文惠太子也太子入居東宮爲步兵校尉管書記直永壽省校四部圖書任昉傳梁武帝時爲祕書監自齊永元以來祕閣四部篇卷紛雜昉手自讎校由是第目定焉殷鈞傳梁武帝時歷祕書丞在職啟校定祕閣四部書更爲目錄張宏策子纘傳補國子生起家祕書郎祕書郎四員宋齊以來爲甲族起家之選待次入補其居職例不數十日梁作數是便遷任纘固求不徙欲遍觀閣內書籍常執四部

書目曰若讀此畢可言優仕矣以上各家所言四部
疑皆仍荀勗之舊惟隋志依荀而又改移之自後唐
宋以下爲目者皆不能違

十七史商權卷六十七

十七史商榷卷六十八

東吳王鳴盛述

北史合魏齊周隋書四

併合各代每一家聚爲一傳

前言南史併合宋齊梁陳似成一代爲非又言以家爲限斷不以國爲限斷一家之人必聚於一篇以一人提頭而昆弟子姓後裔咸穿連之使國史變作家譜最爲謬妄今北史亦用此例后妃分上下二卷上卷皆魏后妃下卷則齊周隋三朝后妃共爲一卷非其類而強相毗附真成笑端李延壽聊欲以此略顯

所長自謂於舊錦機中織出新花樣無此直鈔胥而
已故不得不爾至如魏書有長孫嵩傳周書有嵩之
五世孫儉傳而北史則遂以儉入嵩傳魏書有于栗
磾傳周書有栗磾之六世孫謹傳而北史則遂以謹
入栗磾傳魏書有封懿傳北齊書有懿之族元孫隆
之傳而北史則遂以隆之入懿傳如此之類甚多略
舉幾條以明之延壽之爲此不但欲使與南史體例
畫一亦借以略顯所長耳而於史法則謬矣方敘魏
人忽入隋事欲觀周傳偏涉齊朝使讀者左顧右盼
顛倒迷惑且似將齊周隋人皆提入魏魏太飽齊周

隋太飢殊非著述之體其病正與南史同

若酈道元文士也爲叛臣蕭寶夤所殺亦可憫魏書
乃入酷吏明係曲筆宋世軌執獄寬平至使高洋亦
重其骨鯁北齊書僅與其兄世良同入循吏義太淺
狹北史則以道元升入其父範傳以世軌升入其伯
父隱傳却是然此乃撞著法耳豈真胸有定見而然
乎

楊元感李密

爲魏臣傳而并楊元感亦入之其祖敷傳中爲周臣
傳而并李密亦入之其曾祖弼傳中其不倫不類專

以門族爲敘全不顧情事顛倒如此若論史例元感等自當別題叛臣

立文宣王廟

北史后妃傳魏文成文明皇后馮氏傳太后立文宣王廟於長安案此太后父也文上當有父字魏書亦無之魏書后妃傳亡後人卽以北史補之故同

后妃傳論

鄭樵詆班固勦襲史記不以爲恥樵妄人也固豈不能自譏者若李延壽則真無恥矣論全取各書不自下筆后妃傳論雖魏收李百藥元文多亡然延壽之

論悉亦取之於彼論語亂十人馬鄭皆云有文母唐時俗本添臣字然開成石經尙無之而劉原父遂以爲邑姜今觀北史后妃傳論云神武肇興齊業武明追蹤周亂則此說出百藥無知妄作唐人啟之宋人踵而甚焉耳

清河王紹母賀

道武子清河王紹傳紹母賀有罪將死密告紹遂弑道武賀卽獻明后妹此從母也豈可納而納之及禍宜矣

以禁錮爲禁止

獻文六王元韶傳齊文宣誅諸元餘十九家竝禁止之禁止似當作禁錮而北齊書紀傳亦皆作止觀高隆之傳及北齊酷吏傳則知凡禁囚皆云禁止此當時語

高洋大誅元氏

彭城王勰及其嫡子劼魏收比李延壽詳幾倍之凡今魏書所有諸王傳苟係魏書元文非亾闕而後人以北史補之者則無有不魏詳而北略者也至劼之子韶則魏書只以十七字了之而北史敘述甚詳又因韶之歿詳述齊文宣殺元氏子孫事此事北齊書

韶自有傳所述與北史同蓋李延壽襲李百藥也若
魏收則齊臣爲齊諱又韶旣入齊事不關魏故遂略
之自劉裕始殺故主蕭道成并滅前代之裔至高洋
之慘酷則亘古所無七月大誅元氏而洋卽以十月
暴崩適會其時乎抑真有果報乎若有果報洋不合
良歟

殺元氏子孫北齊書本紀甚略惟元韶傳詳之而北
史文宣紀則加詳但元韶傳言歿者七百二十一人
與北齊書同而紀言所殺三千人一書中紀傳互異
亦一病洋旣因王莽誅劉不盡使光武中興欲盡滅

元氏恐當以三千人爲確新唐書宰相世系表序元魏之後聞於唐者甚多宰相一人稹相穆宗然所列者皆是後周韓國公謙及隋兵部尙書平昌公巖之後則知元氏惟西魏尙有存者而東魏已絕文成五王等傳末論云魏自西遷之後權移周室而周文天縱寬仁性罕猜忌元氏戚屬竝見保全內外任使布於列職孝閔踐祚無替前緒明武纘業亦遵先志雖天厭魏德鼎命已遷枝葉榮茂足以愈於前代可見在唐皆西魏子孫

元韶傳末又贅一段元世哲之從弟黃頭使與諸囚

自金鳳臺各乘紙鴟以飛黃頭獨能至紫陌乃墜仍
付御史獄畢義雲餓殺之此北齊所無畢義雲者見
其曾祖眾敬傳末又見崔暹和士開及齊宗室平秦
王歸彥傳又見北齊酷吏傳又見循吏宋世軌傳洛
州民行劫吏捕案連諸元徒黨千七百人世軌多原
宥之與義雲爭執文宣尚褒美之世軌卒繫囚皆哭
誅元氏世軌死矣義雲方得志而彼書於元韶傳不
言義雲賴北史見之此則北史之善

河陰之難魏之百官王公卿士二千餘人皆爲爾朱

榮所殺

見榮傳

朝宁幾爲之一空楊銜之洛陽伽藍記

第四卷云河陰之役諸元殲盡王侯第宅多題爲寺是也未及三十年而元氏子孫三千人又被高洋盡殺之且前代之翦滅猶不過陰行醜害此則駢斬於市男子無少長皆就戮嬰兒擲于空中承之以稍誅屠之慘一至於此

清河王懌

清河王懌傳褒美甚至而靈太后胡氏逼幸懌事竟未及一見但於論中補云遭牆茨之逼然此事究當以見於傳中爲是北史諸王傳論皆襲魏書魏書諸王傳中有無論者幾卷皆以亾佚而後人用北史補

其實北史本係取之魏書也卽如魏書懌傳無論則必是用北史補者而其實北史此傳并論正出魏收手恐係李延壽妄意論中已見之語傳中不必明著其事遂刪去之耳試思如此逆理事竟去之而純用褒詞可乎

宣武誤爲孝武

北史第十九卷一卷之中所列諸王傳內凡稱孝武帝者惟安豐王猛傳附子延明傳末段敘其受元顥委任元顥敗奔梁瓜莊帝末喪還孝武初贈太保云云又汝南王悅傳末段敘其至孝武初除大司馬府

孝武以廣陵頗有德望以悅屬尊地近內懷畏忌故前後害之此兩處孝武皆不誤其餘凡云孝武皆宣武之訛孝武帝卽平陽王修魏書每稱出帝以其奔於宇文泰也此魏之末帝而宣武則孝文之子在其前相距甚遠李延壽執筆修史而昏謬如此此亦妄人也已矣

代人

北史諸傳首輒云某郡某縣人而第二十卷衛操等二十一卷燕鳳等二十二卷長孫嵩等二十三卷子栗磾等二十五卷古弼等皆云代人此等不可枚舉

皆因魏書蓋托跋氏元從部落不可言郡縣故也

以金石爲史料

衛操立碑大邳城南頌魏功魏功傳中詳載碑詞以金石爲史料始於史記秦皇紀漢書郊祀志今此則魏收元文北史襲之金石之學魏收酈道元闕駟等已重之

崔浩傳誤

魏書崔浩傳言其修國史事共三段初太祖道武帝詔尙書郎鄧淵著國紀未成太宗廢而不述世祖太武帝神䴥二年又詔集諸文人撰錄國書浩及弟覽

高謨鄧穎晁繼范亨黃輔等共參著作敘成國史太平真君中又詔浩監祕書事以中書侍郎高允散騎侍郎張偉參著作續成前紀至於損益褒貶折中潤色浩所總焉後又云著作令史太原閔湛趙郡鄒標素諂事浩乃請立石銘載國書此所敘雖不相連屬而實一事蓋國史之作鄧淵始之浩及覽等續之其卒則浩與允等成之閔鄒請刊遂以構禍胥是物也北史別載監祕書事于前後乃總敘鄧淵等云云以著于著作令史之上則似湛標所請刊但卽浩及覽等書於允等無與且似以神靡真君兩事爲一事非

也浩之敗雖由自取太武信讒亦爲失刑觀本紀厥後又嘆崔司徒可惜何自相違反德清徐以泰陶尊北史雜咏有云國史成來立石妨頭顱不淨竟罹殃未知畫紙傳何語賡有人間急就章此詩悲惋有味

長孫幼

長孫道生之曾孫翼歸六歲襲爵降爲公孝文以其幼承家業賜名幼字承業案魏書本是賜名稚字承業北史因稚爲治之嫌名故於其傳中以字稱而於其篇首又改名爲幼更淆誤矣若直改云賜名承業亦非其實然後人以魏書考之可得今改幼或他處

本當爲幼者反令人疑是稚矣總之嫌名之諱不可

更用他字代

崔逞傳逞之元孫休以女適領軍元又庶長子舒據魏書作稚舒去稚字

三公

司徒公太尉公之類北史中甚多此皆古者三公之稱後周人改官制所定蘇綽慕古而爲之後周時古制尙可攷詳予尙書後案近人校此者不識徃徃去公字非也

斛薛

長孫承業之元孫晟傳仁壽三年鐵勒思結伏具渾斛薛阿拔僕骨十餘部來降斛薛隋書作斜薩佛書

菩薩薩本薛字故轉寫變改斜之爲斛則形似而誤

博崔

崔悛傳悛謂盧元明曰天下盛門唯我與爾博崔趙李何事者哉博崔謂博陵崔氏悛自以清河崔氏爲魏崔琰後高於博陵崔也此傳北齊書悛妾馮氏斬於都市而北史添斬爲九段悛婿魏收收笑之而北史添縮鼻笑之所添如此殊覺無謂

三處郎中

宋世軌傳天保初歷三尚書三公二千石都官郎中兼并州長史考齊制三公郎中二千石郎中都官郎

中皆屬尙書省故云云也并州長史是外官而郎中是京官云兼者蓋遙領之北齊書無此幾句下文稍遷廷尉少卿北齊書直作卿皆當從北史

解巾

刁柔傳初爲魏宣武挽郎解巾司空行參軍前三十五卷論漢末處士皆戴幅巾解巾者解去幅巾將襲章服猶云釋褐也亦見裴俠傳南史亦每用之又第四十三卷邢巒傳附其族孫劭傳又作釋巾義與解巾同

李先傳末世系

李先入魏在皇始初當晉孝武帝太和末其傳末附
先之少子皎皎之孫義徽則事在魏末自皎以下一
大段皆魏書所無而李延壽附益者舉屬閑文毫無
關係敘完義徽事下乃又云少子蘭云云此少子則
似是皎之少子何則魏書先卒於神麤二年年九十
五神麤二年當南朝宋文帝元嘉六年而蘭於孝昌
中以孝行被旌當梁武帝之中世去先歿已百年必
非先之少子况前已敘皎爲先少子不應此又是先
少子也其下文又言文宣王亶思義徽之美薦其孫
景儒爲官景儒之子昭徽入隋大業中隱嵩山其時

代似爲相合但考其世次則昭徽是義徽之曾孫以曾孫而名上同於曾祖旣非鮮卑此事之不可者北史此段敘次雜亂全不明析

毛脩之朱脩之不當兩傳

前論李延壽於薛安都南北皆有傳爲非今觀北史毛脩之傳附以朱脩之而南史毛朱已各爲一傳毛在南事蹟雖多終沒於魏朱在北事蹟雖多終沒於宋沈約本南人况獨脩宋書取其周備槩行收入尙差可延壽旣以一手裁定八代爲二當核其人終南者歸南終北者歸北毛朱兩處有傳謬與薛安都同

司馬休之等一卷

司馬休之等十餘人合爲一卷皆晉宋齊梁之宗室
子姓降北者似得類聚之道在李延壽亦若自成一
種體例矣然以魏齊周隋各代臣攬令和合究屬欠
妥且北齊書有蕭明傳明卽貞陽侯淵明避諱去淵
字梁武兄長沙宣武王懿之子齊送歸主梁祀陳霸
先廢之仍歸齊卒於鄴北齊人謚之曰閔皇帝李百
藥入之北齊書甚妙而李延壽但入之南史於北史
竟不見則又遺漏又有蕭莊者梁元帝嫡長子方等
之子也王琳輔之稱帝於郢州後敗亦歸北齊事見

陳書第十八卷袁泌傳此當歸北朝諸臣之列而北齊書漏去李延壽但見之南史而北史反不及亦非

南齊蕭寶夤傳與北史異

魏書蕭寶夤傳敘寶夤於梁武帝破建業執囚將殺之逃入魏歷仕魏朝并屢率兵與梁人交戰直至孝昌三年十月於關中謀反軍敗逃奔万俟醜奴至永安三年爾朱天光破醜奴擒寶夤送京師賜死計寶夤初入魏當魏宣武帝景明初其死則在孝莊帝時矣北史盡取魏書元文而刪潤之大略相同乃南齊書寶夤傳則云和帝立西臺以寶夤爲使持節都督

南徐兗二州軍事衛將軍南徐州刺史少帝以爲使
持節都督荆益寧雍梁北南秦七州軍事荊州刺史
將軍如故宣德太后臨朝梁王爲建安王改封寶貨
爲鄱陽王中興二年謀反誅若然則與魏書北史大
相乖刺且寶貨少於魏莊帝時去齊和帝中興二年
卽梁武天監元年相隔約三十年此蕭子顯之曲筆
也

蕭大圓傳刪非

蕭大圓傳元帝謂曰河間好學爾既有之臨淄好文
爾亦兼之然有東平爲善彌高前載又滕王道問曰

吾聞湘東王作梁史帝紀奚若隱則非實記則攘羊對曰君子之過如日月之蝕彰於四海安得而隱之蓋子爲父隱直在其中諱國之惡抑又禮也案前載下周書有吾愛之重之爾當效焉隱之下周書有如有不彰安得而不隱前段刪之則成不了語後段刪之則使上下文意不貫

高允與神武爲近屬

魏書三十二卷高湖傳勃海蒨人漢太傅哀之後祖慶慕容垂司空父泰吏部尙書湖少與兄韜俱知名四十八卷高允傳勃海人祖泰在叔父湖傳父韜少

知名案周文帝討高歡檄雖云出自輿阜其家世却不賤神武本紀云六世祖隱隱生慶慶生泰泰生湖湖生謚謚生樹生是爲皇考然則允之祖卽歡高祖允是歡五世內從祖近親屬也歡貴執魏權以允之名德無所追崇恐有亾佚且本紀之體宜詳先世官位而反不言漢太傅後於慶泰湖但云三世仕慕容氏而不著何官亦爲太簡

爲絕羣

崔挺之子孝芬傳早有才識孝文召見嗟賞之李彪謂挺曰比見賢子謁帝旨喻殊優今當爲絕羣耳爲

絕羣當作爲羣拜紀此後人不知妄改

陳入防江諸地名

崔仲方傳隋文帝時上書論取陳之策曰蜀漢二江是其上流水路衝要必爭之所賊雖於流頭荆門延洲公安巴陵隱磯夏口益城置船然終聚漢口峽口以水戰大決楊素傳隋大舉伐陳以素爲行軍元帥引舟師趨三硤至流頭灘陳將戚欣以青龍百餘艘守狼尾灘以遏軍路素夜掩之銜枚而下破欣虜其衆遂率水軍東下陳呂仲肅據荊州之延洲素遣卒碎其艦大破之陳顧覺鎮安蜀城陳紀鎮公安皆懼

而走巴陵以東無敢守者愚謂蜀漢二江者謂江與漢也巴陵今縣屬岳州府以二傳參觀自巴陵以西情勢可見觀仲方言下抵益城則直至今九江府德化縣矣自梁末失蜀隋取陳將順流東下故陳人防江西則峽口東則漢口至益城無可防矣

詳見王應麟通鑑地

理通釋第十三卷

崔季舒蹈龍逢之節

崔季舒卽歐魏孝靜帝三拳奮衣而出者陰謀助逆傾險小人也其見殺雖以諫幸晉陽有天道焉李延壽已於孝靜帝紀著其惡而傳多溢美其醜事皆不

著論中至謂其蹈龍逢之節則過優矣北齊此傳與北史全同惟篇首添博陵安平人一句耳蓋北齊缺後人以北史補其實北史皆勦襲北齊龍逢云云本李百藥語

鄭述祖傳衍文

鄭述祖傳齊天保中歷太子少保左光祿大夫儀同三司兗州刺史時穆子容爲巡省使歎曰古人有言聞伯夷之風貪夫廉懦夫有立志今於鄭兗州見之矣遷光州刺史初述祖父爲兗州於鄭城南小山起齋亭刻石爲記述祖時年九歲及爲刺史往尋舊迹

得一破石有銘云中岳先生鄭道昭之白雲堂述祖對之嗚咽悲動羣僚有人入市盜布其父怒曰何負吾君執之以歸首述祖特原之自是境內無盜百姓歌曰大鄭公小鄭公相去五十載風教猶相同其末段則云前後行瀛殷冀滄趙定六州事正除懷兗光三州刺史又重行殷懷趙三州刺史所在皆有惠政案遷光州刺史句當爲衍文前後皆兗州事不應忽夾入光州一句且後既有總敘則此處不合單出光州齊書無此句

斡

裴延儁傳曾祖裔諮議參軍并州別駕案裔音膺海
篇注六合清明南雍本分作天明二字又考歸氏有
光三吳水利錄第三卷載元周文英水利書有云劉
家港南有一大港名曰南石橋港正係太倉嘉定南
北之間西南通橫塘郭澤張涇以至夏駕浦裔子港
入吳松江裔子港今尙有此水名土人呼爲廣上聲
與膺音全不同

常景解州任

常景傳先云除左將軍又云以本將軍授徐州刺史
杜洛周反於燕州以景兼尙書爲行臺與幽州都督

平北將軍元譚禦之又云進號平北將軍其下文敘至與洛周戰敗之下則云降景爲後將軍解州任解州任句必有誤上文景爲徐州刺史及兼尙書爲行臺則已解徐州矣後此未曾授州任此所解者爲何州乎

邢劭傳文襄誤作宣武

邢劭當从力而北史及北齊書皆作邵誤也其云武帝在京輔政徵之在第爲賓客云云武帝當作神武其下文云宣武富於春秋初總朝政崔暹每勸禮接名賢詢訪得失以邵宿有名望故請徵焉宣武甚親

重之多別引見邵舊鄙崔暹無學術言論之際遂云
暹無所知解宣武還以邵言告暹云云考此所敘皆
齊文襄時事而作宣武魏宣武帝相去已遠何致如
此差訛疑傳寫之謬李延壽不至此

爾朱榮傳魏書北史互有得失

魏書爾朱榮傳於其上書答詔及歿後褒贈之文皆
詳載之誠太繁猥北史刪削爲淨又高歡本榮之黨
勸榮稱尊號者見周書文帝紀賀拔岳傳魏書反謂
獻武王即高歡諫止之此亦飾詞曲筆北史削之極是
又北史敘榮譎朝士向河陰長隄遣騎圍而殺之又

有百餘人後至仍於隄東被圍唱云能爲禪文者出
當原其命時御史趙元則遂出作禪文而太原溫子
昇在圍中恥從是命俯伏不應子昇文士而此一事
大節皎然甚爲文人生色後被高澄所惡餓死晉陽
獄尤可悲乃魏書於榮傳及文苑子昇傳皆不載此
一事賴北史表之又榮之子文暢魏書但言其於武
定三年與前東郡太守任曹等謀反伏誅北史則言
文暢姊爲魏孝莊后後爲高歡所納文暢謀殺歡事
敗死皆勝於魏書之諱惡且曲筆書反又以東郡太
守任曹爲丞相司馬任曹皆似較魏書爲實其餘榮

歷官事蹟魏書甚周備北史嫌刪削太多文暢弟文略魏書但附見數句北史則詳述其凶悍之行伏法於齊天保末魏書成於天保五年故不及耳至謂文略大遺魏收金請爲父作佳傳收論榮比韋彭伊霍蓋由是也收傳亦載之此則大不然魏收因爲齊臣但爲齊諱飾而已於榮之惡逆未嘗不直書之論云始則希覬非望睥睨宸極終乃靈后少帝沈流不反河陰之下衣冠塗地此其所以得罪人神而終於夷戮也向使榮無姦忍之失修德義之風則彭韋伊霍夫何足數繹其詞豈受金而爲作佳傳者亦本不以

伊霍比榮此斷不可信北史文暢文略事皆取北齊書外戚傳也河陰殺千三百餘人而北史改作二千餘人恐亦欲甚榮罪增加之總之魏書北史互有得失

珍念賢

賀拔允傳父度拔爲衛可瓌所虜度拔率州里豪傑珍念賢等襲殺可瓌同卷有念賢傳亦載此事明係一人彼傳中屢稱爲賢則念是其姓此傳珍字衍周書念賢與賀拔勝同傳衛可瓌彼作可孤無定字

對兄自稱兒

齊安德王延宗傳云文襄第五子也後主聞周軍已入肥鼠谷乃以延宗爲相國并州刺史總山西兵事謂曰并州阿兄取兒今去也案後主是武成子武成是文襄之弟則後主應呼延宗爲兄自稱兒者齊有呼父爲兄兄者見南陽王綽傳呼母姊姊見文宣李后傳則對兄自稱兒亦當時語

琅邪王儼見殺

琅邪王儼傳儼以專殺和士開後主使劉桃枝以袖塞其口反袍蒙頭負出至大明宮鼻血滿面立殺之顏之推家訓教子篇乃云幽夢之推與同時目覩其

事形之紀載而與史不同如此又齊初賢輔首推楊
愔遵彥被李延壽提入楊播傳據傳愔爲常山王所
殺之推家訓慕賢篇乃云遵彥爲李昭所戮者常山
王卽孝昭帝李昭乃孝昭之誤

程榮彙刻漢魏
叢書本如此

齊人避諱

北齊人稱周文帝不稱其名爲宇文泰而每稱其小
字曰宇文黑獺者以高歡之高祖名泰也趙彥深名
隱乃不稱其名而稱字者以高歡之六世祖名隱也
惟竇泰與歡皆以側陋起事親暱而有功竟未追改
其名

万俟普等

万俟普等傳大率多係爾朱榮或爾朱兆爾朱世隆
爾朱仲遠輩之部將僚屬後從神武者官位事蹟刪
去太多破六韓常傳云右谷蠡王潘六奚與魏戰敗
沒於魏子孫遂以潘六奚爲氏後誤爲破六韓攷魏
書又作破洛汗洛又作落周書于謹傳又作破六汗
無正字張保洛傳未附見從神武出山東諸將賀拔
仁麴珍段琛尉標子相貴康德韓建業封輔相范舍
樂牒舍樂凡十人略本北齊書康德齊作王康德此
脫字又北史所增者賀拔仁當別有據仁無善人此

當乙漢地理志雁門郡有善無縣酈道元水經注第三卷於河水南過定襄桐過縣西下屢言善無縣尉景庫狄干傳亦云善無人此與後高那肱傳皆云無善人必是明季不讀書人妄改又增范舍樂則據慕容儼傳而所刪者則乞伏貴和及弟令和但乞伏貴和兄弟與韓建業封輔相同投周軍此獨見遺蓋因北齊書止有令和歷官而貴和則缺北史遂削之但貴和事傍見綦連猛獨孤永業傳伏傳初從爾朱兆之敗爲神武所獲後以爲親信都督歷河陽行臺洛州刺史雖不詳所終然大略尙可攷令和名慧見隋

書在隋時曾以官爵讓兄則是貴和自齊入周至隋猶存也牒舍樂范舍樂齊書附見慕容儼傳甚詳此張保洛傳末乃又復出牒舍樂事彼此重叠殊屬非體此則齊書之失不如北史將二人俱附張保洛後而於儼傳末刪去爲妥

又彼書於保洛傳末言牒舍樂武成初爲營州刺史於儼

傳末言其歸高祖後爲營州刺史高祖卽神武

彭樂

而齊書例稱高祖不稱神武武成二字大誤於齊爲梟將與高敖曹齊名而齊書不著其傳疑脫簡北史有之此其勝本書處至其卷末論曰爾朱殘逆遠効誠欵知神武陵逼隨帝西遷去就之途未爲失節道元感母兄之戀荷知遇之恩思親懷舊固其

宜矣生不屈西朝歸誠河朔保年之於開義異策名
並乘機獨運異夫盜竄竊邑者也此段殊多舛謬大
約是傳寫之訛爾朱云云突如其來此上當有缺文
此謂万俟卨父子也生謂劉豐生也或稱劉豐或稱
劉豐生往往錯見彼時俗如此保年之於開義異策
名此當謂破六韓常而文意乖刺不可解且不可句
姑闕之

慕容紹宗傳刪非

慕容紹宗之從爾朱榮及爾朱兆屢言高歡不可信
力勸殺之歡幸獲免後歸歡待之仍厚終得其力此

事雖見他傳本傳亦不可略北史竟全刪之論云紹宗昔事爾朱固執忠義不用范增之言終見烏江之禍如此則傳與論不相應矣非也

金造遠

婁昭之子定遠傳穆提婆求其伎妾定遠不許因高思好作亂提婆令臨淮國郎中金造遠陰與思好通云云案北齊書作郎中令告定遠云云北史誤以令爲金告爲造而又脫定字遂似有一郎中姓金名造遠者閱之令人捧腹絕倒

房謨

房謨傳長約一千五百字北齊書無

叱羅協等不宜附宇文護

各書皆以事類爲敘不依族屬故周書邵惠公顥三子什肥導護而護則自爲傳不附顥下其叱羅協馮遷二人因護而進故附護傳齊煬王憲文帝第五子而別爲傳不與他子同傳類聚之道如此李延壽專以族屬爲類不論其人之事蹟多少關係輕重及其爲人之賢否凡臣皆然何況帝室故遂以護憲併入諸兄弟共卷旣如此則協遷二人自宜別傳乃仍附護傳得無自亂其例乎

萊王衍

周室諸王傳宣帝三子朱皇后生靜皇帝王姬生萊王衍云云萊王周書作鄴王未知孰是衍彼同但靜帝紀本諱衍後改闡然則衍當作衍

周宗室諸王名

周宗室諸王爲隋文帝所殺見於周書者曰胄曰洽曰椿并椿之子道宗等五人曰眾并眾之子仲和等二人以上皆宗室曰寔曰招并招之子員等五人曰乾暉曰純并純之子謙等三人曰盛并盛之子忱等五人曰達并達之子執等二人曰絢曰迥并迥之子

祐等四人以上皆文帝子孫曰湜孝閔帝之孫曰賢
并賢之子宏義等三人曰貞并貞之子德文以上皆
明帝子孫曰贊并贊之子道德等三人曰贊并贊之
子忠等四人曰允曰充曰允曰元以上皆武帝子孫
曰靜皇帝曰衍曰衍以上皆宣帝子共計殺五十九
人北史於某王之子某等名徃徃刪去不載謬甚周
書元偉傳末云太祖天縱寬仁性罕猜忌元氏戚屬
並保全之云云愚謂以宇文泰之寬仁當食美報然
其子孫爲高歡所殺者有之爲宇文護所殺者有之
自相翦屠者有之而尤莫甚於隋文帝之多殺此天

道之不可問者若周書不傳徒倚李延壽使枉外者
名不得具於史隋惡不甚彰宇文氏之冤不甚白矣
虞慶則勸隋文盡滅宇文氏李德林固爭以爲不可
然慶則終見殺德林屢被銜而善終則善惡之報究
不爽云

達奚武等傳

達奚武等十四人共爲傳一卷諸人皆賀拔岳之部
曲後從宇文泰即周太祖
文皇帝者內惟蔡祐常善田宏三
人非從岳起家者其餘十一人進身多同而其戰功
亦約略相似恰好與前齊臣万俟普等皆爾朱氏部

曲後歸高歡

齊高祖神武皇帝

者同爲一卷遙遙相對位置

頗佳但如常善辛威庫狄昌田宏其戰功大率皆以擒竇泰復宏農戰沙苑河橋等處與他將無甚優劣北史乃獨於此四人盡削去徒敘其歷官寥落數語其傳幾若可以不作者或詳或簡率意爲之殊無義例

王傑等傳

王傑等十餘人大率從魏孝武帝西遷者故亦同爲一卷內王勇亦由賀拔岳部將起因與王傑以賜名牽連差有說李和亦由賀拔岳僚屬起或因係文官

不入彼卷然各卷文臣與武將本自參雜此已覺無義至於耿豪的係賀拔岳部將後歸周而戰功正與達奚武輩同宜在彼卷而反入此卷又如泉企李遷哲楊乾運扶猛席固任果皆係南朝臣後入周者正係別自爲類故周書合爲一卷李延壽乃攙雜入王傑等卷中尤非其類但圖并省卷數而已泉企周書作泉企企字思道作企爲合

隋宗室諸王

宗室諸王傳應居羣臣之前隋書乃間廁於李德林傳後北史提前又隋書以疏屬河間王宏等爲一卷

居前以滕穆王瓚等爲一卷皆隋文帝嫡弟姪反居後北史則并爲一卷篇首云蔡景王整隋文帝之次弟也文帝四弟整及滕穆王瓚與弟同生次道宣王嵩次衛昭王爽並異母此其長幼之次隋書不言北史當別有據而卷中先後卽依此次敘完四王方及宏等於親疏長幼爲順隋書則首瓚次嵩之子次爽次方及整之子似欠順其實李延壽意不過欲以遷移見長耳嵩與整皆歿於周世在隋文帝未受禪時故標題以其子爲主於子傳中追敘其父不依整等長幼爲次於理亦通其宏等卷中觀德王雄則北史

已先提入其父紹傳在周臣之列故於隋宗室中削去不載此亦不過專敘諸牒門族之故智而已惟整傳詳載隋文帝憎嫉同生二弟語一段反覆二百餘字周書所無此則北史之能補益者

高頴等傳

隋書以高頴與蘇威同傳韓擒虎與賀若弼同傳以頴威皆隋宰輔威又頴所薦雖行迹不同理宜合敘一篇韓賀隋之大將武功最顯合敘更宜北史則威已提入其父綽傳在周臣中擒虎提入其父雄傳弼提入其父敦傳亦皆在周臣中強以牛宏李德林配

類殊覺不倫不見韓賀隋武臣寥落甚矣如此作史甚不便於觀覽

梁士彥子五人

梁士彥傳末旣云有子五人而其下只出三人名蹟餘二人并名不見則上文五人二字無謂當从隋書補

子都督烏丸軌

達奚長儒傳周文帝引爲親信以質直恭樸授子都督數有戰功天和中除渭南郡守位驃騎大將軍開府儀同三司從武帝平齊遷上開府進爵成安郡公

別封一子縣公宣政元年除左將軍勇猛中大夫後
與烏丸軌圍陳將吳明徹於呂梁云云案子都督乃
帥都督所統也一作大都督非烏丸軌卽王軌梁士
彥傳與此傳作烏丸軌本姓烏丸氏

二王同諡

代王侑越王侗皆隋煬帝元德太子之子侑爲唐高
祖所立侗爲王世充所立皆被弑耳隋書侑紀侑以
武德二年五月崩其下不言唐志也北史亦然此不
足怪惟是隋書王充傳避諱去世字有侗歿之年無月侗
傳則侗約以世充僭號之後月餘被弑僞諡爲恭皇

帝北史世充傳先言廢侗陰殺之下言僭卽皇帝位
微誤計二王被弑幾幾同時侗稍在前亦不過旬月
事世充僞諡唐殆未之聞是以同諡爲恭不謀而合

孫靈暉附石曜

儒林孫靈暉傳附馬子結因同爲南陽王所薦及之
耳至石曜當另傳不當附入且論其行事宜入循吏
不應入儒林也

十三家

劉炫自陳于吏部爲狀曰周禮禮記毛詩尙書公羊
左傳孝經論語孔鄭王何服杜等注凡十三家雖義

有精粗並堪講授所舉凡六家而云十三家者僞孔
安國尙書傳鄭康成周禮禮記注毛詩箋尙書論語
注王肅周禮禮記毛詩尙書注何休公羊學服虔左
傳解詁杜預左傳集解也

晉陵王孝式

文苑傳序齊後主因畫屏風敕通直郎蕭放及晉陵
王孝式錄古賢烈士及近代輕艷諸詩以充圖畫晉
陵二字衍齊蕭放上亦有蘭陵二字北史刪之此誤
留也

逋峭

齊文襄引溫子昇爲大將軍諮議子昇前爲中書郎
嘗詣梁客館受國書自以不修容止謂人曰詩章易
作逋峭難爲案宋人小說魏收有庸峭難爲之說人
不解其義文潞公以問蘇子容子容曰向問之宋元
憲云事具本經蓋梁上小柱取其有曲折峻峭之勢
耳言人之儀矩可喜者曰庸峭就其說庸似與逋同
而誤爲魏收語也

溫子昇等不當入文苑

李延壽諸論皆勦襲而北史文苑傳序忽滔滔自運
縱筆千言取舊者甚寡然按其實皆浮詞耳溫子昇

傳皆與魏書同而篇末弟子盛以下數句彼無增補
有小益但如子昇及許善心魏書隋書因係大人物
皆爲列傳卽欲改亦宜改入節義蓋子昇之不久於
爾朱榮特其幸耳二人皆志在成仁者李延壽妄以
己意改入文苑此何爲者

茹瞻

樊遜傳末忽附茹瞻無所係屬與史例不合齊書無
朱長生等傳與魏書異

朱長生于提使高車不拜其王阿伏至羅阿伏至羅
大怒絕其飲食從者三十人皆求阿伏至羅乃給以

內醅長生與提又不從乃各分徙之求魏作降長生
上魏有惟字無下又字與北史不同似以北史爲正

沙門靈遠

藝術劉雲助傳沙門靈遠者有道術嘗言爾朱榮成
敗預知其時又言代魏者齊葛榮聞之故自號齊及
齊神武至信都靈遠與勃海李嵩來謁神武待靈遠
以殊禮問其天文人事對曰齊當興東海出天子今
王據勃海是齊地又太白與月竝宜速用兵遲則不
吉案沙門靈遠語齊書以爲爲葛榮言北史當別有
所據

信都芳

信都芳魏書附傳齊書亦有傳北史所載周髡宗序則兩書所無有然甚多缺誤

何稠傳錯誤

何稠傳象州逆州開府梁昵討叛夷羅壽羅州刺史馮暄討賊帥杜條遼羅州逆帥龐靖等相繼降欵分遣建帥李大檀象州逆下刻本訛舛當移帥杜條遼至分遣建十八字屬于下而接以州開府云云

封譙國夫人

烈女譙國夫人冼氏傳羅州刺史馮融爲其子高涼

太守寶聘以爲妻寶卒追贈寶爲廣州總管封譙國夫人幕府總管下隋有譙國公冊夫人爲譙國夫人仍開譙國夫人幕府十九字應補去封譙國夫人五字

鎮鄴大丞相

僭僞傳慕容寶卽位以德鎮鄴大丞相案魏書云以德鎮鄴後拜丞相此云鎮鄴大丞相文義欠通

後梁最難位置

史家最難位置莫如後梁蕭詧三世矣詧初附於西魏似應入魏書然其時名雖魏實宇文泰秉權不入

魏而入之周可也。晉歿於周代，謂之純周可也。其子
歸其孫琮，皆隋人。又當入隋書，但歸琮方爲隋臣，豈
得因子孫歸隋，追命祖父爲隋乎？似應仍歸梁，但梁
元帝雖無人道，畢竟侯景係其所討誅，不得不以正
統歸之。舍此梁統幾無所系。然則晉是元帝之逆臣，
若入梁書，將舍敬帝而以晉嗣。元帝列於本紀，有此
理乎？若與正德輩合傳，列於侯景之前，又覺太過。梁
元帝無故聽讒殺桂陽王曄，滅河東王譽，晉救譽結
怨，逃死附魏，豈與正德等比？且正德等轉眼卽亡，晉
稱帝三世存，梁祀三十三年亦未可爲列傳。轉轉思

之無可安頓故令狐德棻不得已而附周書末然多
所牴牾名實不副究屬欠妥李延壽於北史末別立
僭偽附庸一目而入之但赫連勃勃等於魏爲敵國
後梁於周隋爲臣屬二者何可強合愚謂此特礙難
作傳耳若竟作傳以訾入周書以歸琮入隋書似可
總之史家最難位置莫如後梁

田杜青和

蠻獠傳蠻帥田杜青和及江漢諸蠻擾動大將軍楊
忠擊破之其後蠻帥杜青和自稱巴州刺史云云杜
青和與上田杜青和自是一人二者必有一誤

無車有輿

西域傳嚙嚙國其國無車有輿車輿不知何別疑有字衍

高車脫文

高車蓋古赤狄之餘種也初號爲狄歷北方以爲高車丁零以爲下魏書有敕勒諸夏以爲六字北史無魏書缺本以北史補之是今刻本脫非北史本然

北史例異於南史不可解

南北史雖裁成一手儻南史所有北史不當有者原不必一律若南史以侯景等別標一目曰賊臣傳甚

確乃字文化及親弑其君而北史入之其父述傳并同黨司馬德戡裴虔通亦附入縱隋煬罪浮桀紂化及非奉天討之人至王世充僭卽偽位弑皇泰主亦爲列傳則何以服侯景等乎

隋書以化及世充列末卷在異域之後極是

中常侍宗愛弑世祖太武帝燾立吳王余又弑之連害二主惡逆重大乃不曰曰賊臣而但入之恩幸此

其體例之不一而甚不可解者也

北魏書以宗愛入閹宦傳尙差可而

北史改入恩幸則大非

南史於諸列傳之下首次之以循吏次

文學次孝義北史則以循吏居各傳後此又何義乎

都督總管書法

魏收官氏志於魏官制皆據高祖太和中所議定著於令者而分作兩番敘次前番所列第一品下有都督中外諸軍事此因漢大將軍而變稱之尊比三公權任尤重與在外府州之都督無涉此下從第一品上內有都督府州諸軍事第二品上內有都督三州諸軍事第三品下內有都督一州諸軍事若刺史則但有司州餘不見此不可解俟考其後番所列乃太和二十三年高祖復次職令帝崩世宗班行以爲永制者此內不見都督府州及三州一州等亦不知何故而司州改名牧第三品有上州刺史從第三品有

中州刺史第四品有下州刺史隋書百官志下隋州
置總管者列爲上中下三等總管刺史加使持節前
論南史書都督刺史之非已見六十四卷魏制與南
略同周改都督爲總管義則一也今觀北史長孫儉
傳書都督三荆等十二州諸軍事荊州刺史總管荆
襄等五十二州諸軍事行荊州刺史是爲得之其他
傳每改云都督某州刺史又云某州總管皆非也一
書之中而有得有失參錯不齊義例無定故也周書
於儉傳所載官銜不詳當以北史爲正至其云大都
督十五州諸軍事荊州刺史十五州上當有荆襄等

三字其云轉陝州總管七州諸軍事陝州刺史七州
上當有陝熊等三字大約北史各傳所書官銜惟儉
傳爲最得而尙有此二失史家敘事貴簡潔獨官銜
之必不可削者任意削之則失實欲刪支詞何處不
可刪豈須在此等處省幾字乎若陸侯傳末附陸獻
傳云除使持節都督恒州刺史魏書則云都督恒朔
肆三州諸軍事北史例作都督某州刺史與南史同
如此類者甚多此書都督而謬者又若干翼傳云建
德二年出爲安州總管四年轉宜陽總管又除河陽
總管周書則云安隨等六州五防諸軍事安州總管

陝熊等七州十六防諸軍事宜陽總管洛懷等九州
諸軍事河陽總管北史所書去其總統之州此又書
總管而謬者其周書以安州刺史爲安州總管此周
書失之總管當在安隨等之上北史不能改正而反
甚之則不足責矣未暇條悉略舉一隅以見之
高琳傳天和三年爲江陵副總管周無副字攷下有
總管田宏則當有副字此北史之補之而得者副總
管他無所見惟見於此隋地志亦不載

字體不正

顧氏金石文字記第二卷於後魏孝文帝弔比干碑

摘其別字數十并引顏之推家訓江式上表

見北史本傳

後周書趙文深傳魏書太武帝始光二年本紀因論文字之不同人心之好異莫甚於魏齊周隋之世凡說文所無後人續添之字大都出此時後之君子旋覺其謬自唐國子監置書學博士立說文石經字林之學而顏元孫作千祿字書張參作五經文字唐元度作九經字樣天下之文始歸於一顧氏此論最爲精確愚謂史以紀事傳信較碑版尤要南北各書旣多別體李延壽全不知小學仍訛踵謬觸目皆是前於南史已論之矣今觀北史如以憊爲憊

見齊神武帝紀興和

四以驗為驗見長孫以續為櫃魏宗室常山王遵附

客事暉奉旨藏之於以凡為机景穆十二王傳下刀

之說文有續魏孝文帝太和七年紀以殺為煞見敬

更以算為竿復和竿魏書本作算以投為透齊神武紀孝昌

莊帝紀末篆其左屈曲以投為透元齊神武紀孝昌

右文襄落牛段榮透下取之透下北齊字體不正如

此未能饒舌隨舉若干條以明之

亦有俗書已誤而此尙存古者如以廂為箱神武紀

部督莫多婁貸以擒為禽于栗磾傳見熊羆致御前

文說文無廂字以擒為禽尋禽獲韓雄之子名擒虎

北史既避諱去虎字以賑為振魏書賑字北皆作振

而擒仍作禽不加手以賑為振又隋李士謙傳家富

以振施為務說文以餒為餒崔暹傳附崔子約傳病

卷六下貝部無賑以餒為餒卒謂兄子賸曰汝能勉

十七史商榷

卷六下

七

一
之吾不餒矣但倭國傳當此皆偶合未必因識字能
从委反从妥則二文相亂如此

避諱之例

避諱之例南史已極糾紛北史尤甚如以虎為武見魏

高宗文成帝興光元年又以為豹見魏高祖孝文帝

紀武頭龍頭本虎頭見高宗文成帝興安二又以為深見崔

子本淵為泉年見高宗文成帝興安二又以為深見崔

虎子淵為泉年見高宗文成帝興安二又以為深見崔

字伯淵深世為代蘇綽之子威傳代民為人見高宗文

本伯淵深世為代蘇綽之子威傳代民為人見高宗文

四年紀宰又有因人名犯諱改稱其字者如劉延明

木劉昞而稱延明見本李暎弟仁曜據魏書亦本名

昞而稱仁曜見序鄧彥海本鄧淵而稱彥海見天興

昞而稱仁曜見序鄧彥海本鄧淵而稱彥海見天興

昞而稱仁曜見序鄧彥海本鄧淵而稱彥海見天興

紀

長孫承業本長孫稚因高宗治之嫌名稱承業

見魏

肅宗孝明帝正光元年紀

又有二名犯諱去一字者如韓擒虎為

韓擒

見隋高祖開皇八年九年紀

蕭淵明為蕭明

見齊文宣帝天保六年紀北齊

書

王世積隋煬帝時人隋書有傳而北史為王積

見高

類

又有不改其字而直稱為諱者如李虎直稱為李

諱

見周文帝紀周書則作虎令狐德棻同是唐人彼乃校者改

又有以一字而改

為二字者如趙剛之子仲卿傳仲卿為政猛時人謂

之猛獸此隋書諱改也而北史又改云時人謂之於

龍又有改之而即自明言之者如李煥傳始平太守

景下云名犯太祖元皇帝諱是景本名昞張裔傳本

十七史商榷

卷六十八

美

名犯廟諱是齋本名淵例之不一如此校者每改從
本字或添一字如王雅傳仍云子世積而改之未盡
者亦多至前代之君史家例無諱隋煬帝名廣北史
不諱而李德林傳獨以廣爲諱尤謬

李延壽進南史北史表自稱鳩集遺逸以廣異聞去
其冗長揚其菁華云云見錢希白南部新書庚卷愚
謂延壽所鳩集者豈無小益若云去冗長則所去往
往不當揚菁華則菁華被割棄頗多延壽自稱太夸
矣予循文指摘記于上下隙處殆徧欲悉著于篇恐
嫌累墜今於南史存其十之七八於北史存其十之

三三三

三三三

三三三

三三三

十七史商榷卷六十九

東吳王鳴盛述

新舊唐書一

趙瑩修舊唐書

吳縝進新唐書糾謬表云唐室三百年傳世二十帝興衰之迹未有完史暨五季天福之際有大臣趙瑩之徒綴緝舊聞次序實錄草創卷帙粗興規摹僅能終篇聊可備數我仁宗皇帝臨文咨嗟申命名儒討論潤色積十有七年成二百餘卷案舊唐書向來皆云出劉昫宋刻每卷首列昫名此乃以爲趙瑩新五

代史襍傳劉昫傳當後唐有監修國史之言國史卽唐書至趙瑩傳則無此語薛居正舊五代史瑩傳瑩於後唐位尙卑晉高祖時方爲門下侍郎同平章事監修國史後唐以唐爲本朝故稱國史至石晉革命似不得復名國史但此書始自唐明宗之長興成於晉出帝之開運歷年宰輔皆領其事俱以監修列銜晉人遂仍其故稱而吳縝因有趙瑩修舊唐書之語舊唐書各種本不同宜擇善而從

劉昫等旣修唐書後宋命宋祁等改修爲新唐書而昫書稱舊唐書久之遂廢明嘉靖十七年聞人詮等

重刻成序稱弭節姑蘇窮搜力索吳令朱子得列傳
於光祿張氏長洲賀子得紀志於守溪公遺籍俱出
宋時模板云云觀此則聞人氏據宋板文氏徵明序
云是書嘗刻於越州卷後有教授朱倬名倬忤秦檜
出爲越州教授當是紹興初年云云而其下又有聞
人公得舊刻數冊徧訪斷簡校閱就緒云云釋其文
則聞人所據乃別一宋板非朱倬本也錢敏求名逸
人藏有至樂樓抄本不言出於何人葉石君名萬一
吳縣洞庭山人徙居常熟諸借得以校聞人本多有
生本朝康熙初卒年八十不同張石民名源又借得石君校本以校近沈詹事等

考定葉本石民跋稱葉氏所據抄本係影宋抄每卷

未有校勘人名

有右文林郎充兩浙東路提舉鹽茶司幹辦公事霍文昭蘇之勤等名

末卷有朱倬名然則至樂樓抄本卽是紹興本此本
旣與聞人本不同則知聞人本乃別據一宋刻而非
朱倬本益明但抄本亦不全僅得其半抄本闕者葉
校亦闕石民旣用硃筆臨寫葉校又於聞人本與近
本不同者用黃筆注逐條之旁竊謂校書之道貴擇
善而從徇今而媿陋泥古而迂癖皆病也聞人本與
抄本各據宋板未見抄本必是聞人必非近本改易
聞人本處亦有可從觀葉張兩家大都榮古虐今意

見稍偏予從阮薑邨

名學濟山陽人雍正癸丑進士官編修

借石民本

從李禹定

名大夏吳縣人

借聞人本讐勘近本以己意裁取

不盡從葉張彼校善者從之但稱校本不標孰爲葉孰爲張聞人本則稱原本

通鑑取舊書

文序云司馬氏修通鑑悉據舊史於新書無取焉愚謂通鑑於五代亦多從薛史且其文反繇於歐史可見司馬公不甚取歐宋

宋歐修書不同時

吳縝新唐書糾謬自序云唐書紀志表則歐陽公主

之傳則宋公主之所主既異而不務通知其事故紀有失而傳不知傳有誤而紀不見又云其始也修紀志者則專以褒貶筆削自任修傳者則獨以文辭華采爲先不相通知各從所好其終也遂合爲一書而上之又胡宗愈奏請進糾謬云新唐書乃歐陽修宋祁所撰修撰帝紀表志而祁爲列傳各據所聞商畧不同故其所書事迹不免或有差誤云云愚攷二公修書不相關知其實乃本不同時也考宋史第二百八十四卷宋祁傳言其修唐書在仁宗天聖之晚年歷明道景祐寶元康定至慶歷中告成以書成進左

丞云云凡閱十餘年自守亳州出入內外常以橐自
隨此言十餘年而吳縝則云十七年又言二十年又
第三百十九卷歐陽修傳於遷翰林學士俾修唐書
一段之下卽繼之以知嘉祐二年貢舉云云則修之
修唐書乃在嘉祐之前至和年間事距祁稿成時相
去已十餘年其下又繼以加龍圖閣學士知開封府
旬月改羣牧使唐書成拜禮部侍郎兼翰林侍讀學
士而此下又接云修在翰林八年云云則修書凡歷
六七年之功書成上距祁稿成約又二十餘年矣更
證之以歐陽公年譜

文集分爲十編者附有此譜雖不見撰人姓名要爲可信逐

年鑿鑿指出至和元年甲午八月戊申詔公修唐書
嘉祐五年庚子七月戊戌上新修唐書二百五十卷
庚子推賞轉禮部侍郎然則二公修書不同時明矣
吳言十七年者專指初次宋所修而言云二十年者
合前後兩次所修而言祁與其兄庠同登第授官史
言天聖初而歐公之登第授官則天聖八年年輩名
位稍在其後祁不爲紀志表非以讓歐蓋用其所長
先撰各傳餘姑闕如歐學問文章與祁異趣成名之
後天下重之甚於祁未必肯壹遵祁軌躅上二百五
十卷時恐或有改竄祁稿者

吳縝自序哲宗元祐四年作中有云書自頒行迄今
幾三十載又云方新書來上朝廷付裴煜陳薦文同
吳申錢藻校勘若校勘止於執卷唱讀案文讐對則
二三胥吏足辦何假文館之士必討論擊難刊削繕
完乃稱其職而五人者曾無建明但襲故常惟務暗
默自後遂頒之天下按自元祐四年逆溯至嘉祐五
年恰三十年蓋上進未幾卽頒行然則宋雖撰傳而
總滙裁定實出歐公一手

修書之年以宋歐兩傳爲據可無復疑而曾公亮進
表列刊修官歐陽修宋祁范鎮王疇宋敏求呂夏卿

劉義叟歐在宋前者以書成於歐手其實則宋先歐
後又言凡十有七年成二百五十卷此皆不足泥進
表又云唐書紀次無法蓋百有五十年然後得以發
揮補緝克備一家云云舊唐書成於晉開運之末順
數至嘉祐五年凡一百十五年此五十二字當乙

歐宋不采唐史料諸書辨

邵錫蔭曰唐之史料非不備也義寧武德中有溫大
雅之起居注房元齡許敬宗敬播之三帝實錄若姚
思廉之貞觀紀傳顯慶中長孫無忌于志寧令狐德
柔劉允之楊仁卿崔允又續之龍朔中許敬宗又補

之此則唐開創及盛時所紀載也長安中劉子元朱敬則徐堅吳兢奉詔更撰唐書自創業至開元備是矣而則天高睿中宗諸實錄又出於子元兢所修蕭嵩韋述賈登李銳相繼續錄此唐中葉所紀載也安史之亂史書散失而柳芳有唐歷若韓愈之於順宗蔣乂韋處厚獨孤郁之於德宗韋處厚路隨沈傳師之於憲宗路隨之於穆宗李讓夷之於敬宗魏謩之於文宗韋保衡之於武宗皆有成書宣宗時又詔蔣乂崔龜從韋渙李荀張彥遠續成柳芳唐歷此則唐末世之書可覆視也歐宋諸君一切屏置何怪用意

者入奇澀鋪陳者入迂疎哉愚謂溫大雅以下衆家
亡者多存者少不知邵氏何由而知歐宋一切屏置
不用此說存疑

二書不分優劣

曾公亮進新書表云唐三百年治亂興衰宜其粲然
著在簡冊而紀次無法詳畧失中文采不明事實零
落惟唐不幸接乎五代衰世之士氣力卑弱言淺意
陋不足以起其文使明君賢臣雋功偉烈與夫昏虐
賊亂禍根罪首皆不得暴其善惡動人耳目誠不可
以垂勸戒示久遠宋人之詆舊書如此欲事改修自

不能不痛加指斥今平心觀之二書不分優劣瑕瑜
不掩互有短長至其所云其事則增於前其文則省
於舊辨說詳後各條中

楊氏循吉曰劉昫等撰述詳贍妙極模寫足以上追
史漢下包魏陳信乎史之良者無以加矣奈何宋之
慶歷又出新編大有增損舊書湮沒君子不能無病
諸雲翳白日日行空自如也史可以新掩舊哉吳兢
韋述令狐頤皆金匱上彥操筆石渠劉昫等因三人
舊文爲書郎舍相踵既出螭坳親見又遇劉司徒之
博洽乃克成書忽有改圖殆不其然楊氏此論矯枉

過正不得其平

新書最佳者志表列傳次之本紀最下舊書則紀志傳美惡適相等

賈苹董衡新唐書注

胡三省通鑑注自序云唐書之賈苹董衡注吾無取焉考董衡新唐書釋音二十五卷汲古閣無明南監板有此出宋人手便覺空疎誠如胡說不及何超晉書注其實苹注則亡矣羅泌路史國名紀第四卷辨萊蕪縣地名餘論第十卷論濟水各引賈苹說一條殆卽唐書注文又戰國策高誘本宋刻第二十一卷

趙策盡歸中山之新塋無名氏校注云新唐史集韻
皆云武后所製字寶華作唐史釋音乃云古地字見
戰國策抑別有所據

新唐書糾謬

吳縝新唐書糾謬二十卷自序云此書訛文謬事歷
歷具存予方從宦巴峽僻陋寡聞無他異書可以考
證止以本史自相質正已見其然若廣以它書校之
則穿穴破碎當不止此愚謂只就一部書中按求吳
自言寡聞固矣然且不必論其廣以它書校否也可
笑是并舊書亦絕不一參對爲太省事耳其指摘却

亦有精當處

舊書目錄脫誤

舊書目錄脫誤者如楊恭仁傳恭仁之曾孫睿交睿校本作育傳同此因相似而誤高祖子虢王鳳校本作元鳳傳同然新書亦無元字則未見校本必是良吏權懷恩傳下小字注叔祖萬紀四字近本從宋本添

新書目錄脫誤

新唐目錄后妃傳下宣懿韋太后下注尙恭宋若昭恭當作宮又十一宗諸子傳自奉天皇帝琮以下凡

三十八人此內有有事迹者有無事迹者考之傳中
人數衆多或見於目或不見於目知目乃隨手開列
參錯不可據也儒學傳下吹助下應添趙匡陸質小
字有注

十七史商榷

卷六十九

九

十七史商榷卷六十九